

公開組

冠軍

【冒雨登昂平夜宿寶蓮寺】黃嗣拔

疊步雲層上寶蓮，有情花雨散龍天。
風幡不動原無念，塵網應慚未了緣。
茶乳款香留小住，秋心將暝入枯禪。
泉聲一枕山齋宿，夢接華嚴法界邊。

亞軍

【閒廳】黃天錫

落花飛雨薄寒天，掩卷閒廳思悄然。
獅嶺疊青來檻外，鯉門浮碧入樽前。
奕迷黑白仍爭局，事有乘除且息肩。
珍重晚晴還望遠，春風同載五湖船。

季軍

【山居】羅忠

蕭齋松護幾經年，萬綠常搖爛漫天。
無事花栽新世界，娛情酒結舊因緣。
鋤雲欲下巖前雨，步月輕分嶂裏煙。
稚子亦甘泉野樂，課餘撩我說神仙。

優異獎

(排名按姓氏筆畫序)

【山居】王忠義

乍雨還晴二月餘，投閒深退似離居。
山行仍夢尋蕉鹿，鳥散非因集苦樗。
蔓草猶憐思遠道，春芳漸歇悟玄書。
重來尚有漁樵約，細說滄桑論太初。

【秋感】白福臻

斷崖飛下瀑，聲滿寺門前。
古佛不解聽，晴巒空復妍。
風高蟬絕唱，影薄樹衰年。
秋氣來何日，相逢此磴邊。

【鄉居】李紀培

市塵久染試鄉居，出可無車食有魚。
覓句每慚書少讀，懺情奈似草難除。
溪山舊話邨醪熟，閭里新風霽景初。
偶聽詩聲籬畔過，誰家菊隱傍吾廬。

【母親節】李漢良

客裏慈恩節，殊鄉念倚閭。
客裏憐篋線，健飯樂畦蔬。
不盡三春感，還期斗粟儲。
辛勤遊子意，陟屺作家書。

【松鶴吟】陳維新

乘軒食祿衛宮前，疊嶂迎風一樹堅。
勁節寒操三徑雪，清聲響徹九皋天。
朱冠白鬣稱千歲，翠蓋蒼顏歷萬年。
最是雲深塵不到，逍遙泉石似雙仙。

公開組

特別獎

(排名按姓氏筆畫序)

【山居回文】高國華

芊芊草徑迷來客，壑嘯松風冷入廬。
泉湧石邊巖立鶴，竹環門外檻栓驢。
先春競放梅香暗，媚月新懸柳影疏。
傳韻響鐘山寺古，錦文回織巧成書。

【離愁】葉蘭英

雁渺魚沈別緒牽，長亭柳老不飛綿。
碧潭金鎖龍難破，銀漢仙橋鶴未填。
風送晚鐘聲不定，煙迷野渡水無邊。
寒侵翠袖憐孤影，凝佇階前待月圓。

【花朝】戴寶蓮

二月香江景物妍，百花如錦嫩寒天。
煙籠芍藥嬌無限，露滴玫瑰艷可憐。
碧草郊原春放馬，玉梨庭院夜調絃。
無端一陣狂風雨，滿地殘英獨惘然。

【寓樓秋唱】顧植槐

樓宇巍峨只一塵，南來客館已三遷。
窗前夜雨飄黃葉，簾外秋聲入短篇。
濡管興酣忘寢食，觀書神會偶批圈。
好懷百歲能開幾，莫遣閒愁困樂天。

學生組

冠軍

【母親節遊香港公園】

何世昌 香港中文大學

傍母看花去，晴暉五月時。
浮雲一水下，拂柳眾雛嬉。
登塔何妨覽，囚籠孰肯羈。
啁啾欲何向，相近莫相離。

亞軍

【遊西湖】

李潤滿 香港大學

偶解勞塵累，忘機返自然。
陰垂細柳直，風動濶荷圓。
信步閒聽鳥，清遊好放船。
何年真散髮，長逝寄湖川。

季军

【夜讀】

馮慶龍 香港浸會大學

芸齋年固陋，藥卷日翻新。
股及千錐破，文經百鍊神。
蛙鳴誇底物，鯨掣出誰人。
一笑書淫在，中宵乞膽頻。

學生組

優異獎

(排名按姓氏筆畫序)

【有所思】

吳楚橋 柏雨中學

碧水皎月照，荷塘楊柳姿。
詩新向誰賦，露重任風吹。
欲抹傷離淚，難舒不展眉。
音容應未改，歲月寄相思。

【應口試】

張可人 聖公會莫壽增會督中學

輾轉難成寐，蒞場天未曦。
心恆行蹀躞，口拙語期期。
思慮須彌密，言辭莫亢卑。
微才今已盡，成敗勿求著。

【夜讀】

楊家爵 香港浸會大學

坐費驅蚊手，床慳託蝶身。
天高思柝廓，書厚負輪囷。
蟹走橫斜字，雞啼晝夜辰。
明窗存白髮，花眼枉經春。

香港公共圖書館

HONG KONG PUBLIC LIBRARIES

優異獎

(排名按姓氏筆畫序)

【初夏黃昏】

霍啟寧 香港中文大學

凭欄初夏晚，紅日遠山平。
施彩雲霞幻，橫天鴉雀鳴。
焚香暮色碎，入戶夜堂明。
滄海通寰宇，心舟一葉輕。

【春憶】

譚卓倫 香港科技大學

花開霧水間，靄靄鎖春顏。
細雨千迴路，濃雲萬轉關。
群芳思暖日，孤鷺念空山。
天似憐春意，清風傍晚還。

特別獎

【春恨】

何本輝 香港樹仁學院

春來三月雨，乍暖又寒時。
夜靜春衫薄，闌深淚眼疲。
十年傷別恨，幾度苦相思。
舉目池塘畔，楊花共柳枝。